

Verum animi rursus , ac mentis tentare vigorem
Aggrediar , veteresque iterum renovare labores .
Nempe sui rursus post tempora longa vocatum
In patriam cives amisso Rege reposcent ,
Regiaque intexent meritis diademata fronti ,
At frustra , & fatis obstantibus . Ipse revellam
Fœdera , & erepto gnatum succedere patri ,
Ingentem magnis gnatum virtutibus , atque
Grandi animo , atque alta fultum pietate , jubebo ,
Necquidquam ferroque Gener pugnabit , & auro ,
Bisque datam Socero necquidquam mille per artes
Tentabit nutantem iterum fulcire coronam .
Irruet hinc denso Germania milite , & inde
Immanis gelidi extremis e finibus orbis
Barbaries excita ruet . Qua strage natabunt
Urbesque , campique omnes ? quæ fracta cruentus
Scuta virum , galeasque , & fortia corpora volvens
Vistula in obstructum tandem vix ingeret æquor !
Rursus igitur patriis fugiens e finibus exul ,
Ignotus ; cultumque habitu mentitus agrestem
Sequanicas ægre demum se reddet ad oras .
Frangeret hic alium post tot felicia casus
Infelix ; Heros animo perstabit eodem
Adversam excipiens invicto pectore sortem .
Qualis , quæ mediis rupes in fluctibus undas
Frangit , & insanos ventorum immota furores
Mole sua ridet tutissima : qualis & Euros ,
Et celso Boream se attollens vertice quercus
Provocat , atque altis fidens radicibus acres
Despectat pugnas , iramque illæsa sonantem .
Hunc igitur tanti tentaminis esse jubebo
Postremum finem demum , metamque laborum .
Fausta tibi , Heroique tuo , quæcumque sequentur ,
Polliceor : junctis pangam nova fœdera dextris ,
Pacatis hostes discedent finibus , atque
Ad sua barbaricus miles glacialia regna